



TOSHKENT DAVLAT YURIDIK UNIVERSITETI REKTORINING BUYRUG‘I

2021-yil 30-noyabr

08-326-son

Toshkent davlat yuridik universiteti mutaxassislik kafedralari huzuridagi Yurisprudensiya ilmiy-tadqiqot markazi to‘g‘risidagi nizomni tasdiqlash haqida

O‘zbekiston Respublikasi Prezidenti Sh.M. Mirziyoev rahbarligida o‘tkazilgan 2021-yil 16-iyundagi videoselektor yig‘ilishining 34-sonli bayoni 2-bandi hamda O‘zbekiston Respublikasi Prezidenti Administratsiyasi rahbarining 2021-yil 29-iyundagi 02-RA 1-10861-son topshirig‘ida belgilangan vazifalar ijrosini ta‘minlash hamda Toshkent davlat yuridik universiteti yosh tadqiqotchilarining ilmiy tadqiqot faoliyati bilan shug‘ullanish borasidagi qiziqishlarini yanada oshirish, shuningdek, kafedralarning o‘ziga daromad topishi uchun qulay sharoit yaratish maqsadida

BUYURAMAN:

1. O‘zbekiston Respublikasi Prezidenti Sh.M. Mirziyoev rahbarligida 2021-yil 16-iyun kuni o‘tkazilgan videoselektor yig‘ilishining 34-son bayoni hamda Prezident Administratsiyasi rahbarining 2021-yil 29-iyundagi 02-RA 1-10861-son topshirig‘i ma‘lumot va ijro uchun qabul qilinsin.

2. Universitetining mutaxassislik kafedralari huzurida Yurisprudensiya ilmiy-tadqiqot markazi (keyingi o‘rinlarda –Ilmiy-tadqiqot markazi) tashkil etilsin.

3. Toshkent davlat yuridik universitetining mutaxassislik kafedralari huzuridagi Yurisprudensiya ilmiy-tadqiqot markazi to‘g‘risidagi nizom ilovaga muvofiq tasdiqlansin.

4. Ilmiy ishlar va innovatsiyalar bo‘yicha prorektor N.Salayev:

Ilmiy-tadqiqot markazi faoliyatini tashkil etilishini ta‘minlash bo‘yicha zarur tashkiliy chora-tadbirlarni amalga oshirsin;

Ilmiy-tadqiqot markazi faoliyati erkin tarzda (akademik erkinlik tamoyili asosida) yo‘lga qo‘yilishiga hamda faoliyati innovatsion va zamonaviy bo‘lishiga alohida e‘tibor qaratsin;

Ilmiy-tadqiqot markazi faoliyati samarali tashkil etilishini muntazam ravishda muvofiqlashtirib borsin.

5. Fakultet dekanlari (A.Babadjanov, Sh.Saydullaev, D.Kamalova, B.Xodjaev, D.Umarxanova):

Ilmiy-tadqiqot markazi faoliyatiga jalb etiladigan kafedra professor-o'qituvchilari haqidagi ma'lumotlarni bir hafta muddatda kafedralar kesimida Ilmiy boshqarmaning Ilmiy tadqiqotlar va ilmiy-pedagog kadrlarni tayyorlash bo'limiga taqdim etsin;

Ilmiy boshqarma (I.Ergashev), Yosh olimlar kengashi (L.Achilova) bilan hamkorlikda Ilmiy-tadqiqot markazi faoliyatiga yosh olimlar va mutaxassislar, tayanch doktorantlar, doktorantlar, mustaqil izlanuvchilar va iqtidorli talabalarni jalb etish choralarni ko'rsin;

Ilmiy-tadqiqot markazi bilan hamkorlikda kafedra tomonidan amalga oshirilgan ishlar to'g'risida har chorak yakuni bo'yicha ma'lumotlarning Ilmiy boshqarmaning Ilmiy tadqiqotlar va ilmiy-pedagog kadrlarni tayyorlash bo'limiga taqdim etilishini ta'minlasin.

6. Ushbu buyruqning ijrosini nazorat qilish Ilmiy ishlar va innovatsiyalar bo'yicha prorektor N.Salayev zimmasiga yuklansin.

Rektor v.v.b.



I. Rustambekov

Loyiha kiritdi:

Ilmiy boshqarma boshlig'i

I.Ergashev

Kelishildi:

Prorektor

N.Salayev

Yuridik byuro
yuristkonsulti

D.Aliboyev

**Toshkent davlat yuridik universiteti mutaxassislik kafedralari huzuridagi
Yurisprudensiya ilmiy-tadqiqot markazi to'g'risida
NIZOM**

Mazkur Nizom Toshkent davlat yuridik universiteti mutaxassislik kafedralari huzuridagi Yurisprudensiya ilmiy-tadqiqot markazini (keyingi o'rinlarda – ilmiy-tadqiqot markazi) tashkil etish va ularning faoliyat yuritish tartibini belgilaydi.

1-bob. Umumiy qoidalar

1. Toshkent davlat yuridik universiteti (keyingi o'rinlarda – Universitet) talabalarining nazariy tayyorgarliklarini huquqni qo'llash amaliyoti bilan uzviy bog'liqligini ta'minlash hamda kafedralarning o'ziga daromad topishi uchun barcha sharoitlarni yaratish maqsadida mutaxassislik kafedralarining ilmiy faoliyat yo'nalishlaridan kelib chiqib ilmiy-tadqiqot markazi tashkil etiladi.

2. Ilmiy-tadqiqot markazi universitetning tarkibiy qismi bo'lib, unda ilmiy-tadqiqot bilan bog'liq bo'lgan ishlar amalga oshiriladi.

3. Ilmiy-tadqiqot markazi o'z faoliyatida O'zbekiston Respublikasining Konstitutsiyasi va qonunlariga, O'zbekiston Respublikasining Oliy Majlisi palatalarining qarorlariga, O'zbekiston Respublikasi Prezidentining farmonlari va qarorlariga, O'zbekiston Respublikasi Vazirlar Mahkamasining qarorlariga hamda boshqa normativ-huquqiy hujjatlarga, O'zbekiston Respublikasi Adliya vazirligi, Oliy va o'rta maxsus ta'lim vazirligining hay'at qarorlari va buyruqlariga, Universitet Ustaviga, Universitet Kengashi qarorlariga, universitet rektorining buyruqlariga, shuningdek mazkur Nizomga amal qiladi.

4. Ilmiy-tadqiqot markazi tarkibiga kafedra professor-o'qituvchilari kiradi. Ilmiy-tadqiqot markazlari tarkibiga doktorantlar, mustaqil izlanuvchilar hamda bakalavriat va magistratura talabalari biriktirilishi mumkin.

5. Ilmiy-tadqiqot markaziga a'zolikka qabul qilishda ularning qiziqishlaridan kelib chiqqan holda xorijiy tillarni bilish darajasi, chop etilgan ilmiy ishlar, erishilgan ilmiy yutuqlar va boshqa shu kabi mezonlar belgilanishi mumkin.

6. Ilmiy-tadqiqot markazi tomonidan har oyda kamida bir marotaba uchrashuvlar va boshqa interaktiv tadbirlar o'tkaziladi (uchrashuvlar shakli erkin

tarzda belgilanadi, masalan, “discussion club”, onlayn yig‘ilish, interaktiv muloqot, ma'ruzalar, seminar-treninglar va boshqalar).

Ilmiy-tadqiqot markazi tomonidan Yozgi (“Summer school”) va qishki (“Winter school”) maktablarni tashkil etishi mumkin.

7. Ilmiy-tadqiqot markazi bevosita Ilmiy ishlar va innovatsiyalar bo'yicha prorektorga bo'ysunadi.

II. Ilmiy-tadqiqot markazlarining vazifalari va funksiyalari

8. Quyidagilar Ilmiy-tadqiqot markazining asosiy vazifalari hisoblanadi:

a) mamlakatda amalga oshirilayotgan ijtimoiy-iqtisodiy, demokratik va sud-huquq islohotlarining ustuvor vazifalarini, ilg'or xorijiy tajribani va xalqaro standartlarni hisobga olgan holda, zamonaviy yuridik fan rivojlanishining ustuvor yo'nalishlari bo'yicha ilmiy-tadqiqot ishlarini bajarish va ularning natijalarini amaliyotga tatbiq etilishini ta'minlash;

b) tadqiqotchilar tomonidan sohadagi xorijiy tajribani o'rgangan holda, ilmiy-tadqiqotlar sifati hamda samaradorligini oshirishga xizmat qiladigan innovatsion loyihalar ishlab chiqishi hamda ularni “start-up” tanlovlarida ishtirok etishiga ko'maklashish;

d) xalqaro standartlarga javob beradigan kafedraning boy intellektual va ilmiy-pedagogik mahoratga ega ilmiy-pedagog kadrlar tayyorlash tizimini shakllantirish bo'yicha aniq maqsadli ishlarni amalga oshirish;

e) tegishli tashkilotlarning buyurtmasiga asosan ma'lum bir sohada haq evaziga ilmiy-tadqiqot ishlarini amalga oshirish.

9. Ilmiy-tadqiqot markazi o'ziga yuklatilgan vazifalarni bajarish uchun quyidagi funksiyalarni amalga oshiradi:

a) mamlakatda amalga oshirilayotgan ijtimoiy-iqtisodiy, demokratik va sud-huquq islohotlarining ustuvor vazifalarini, ilg'or xorijiy tajribani va xalqaro standartlarni hisobga olgan holda, zamonaviy yuridik fan rivojlanishining ustuvor yo'nalishlari bo'yicha ilmiy-tadqiqot ishlarini bajarish va ularning natijalarini amaliyotga tatbiq etilishini ta'minlash sohasida:

Ilmiy-tadqiqot markaziga biriktirilgan shaxslar tomonidan ilmiy ishlarni amalga oshirish uchun tegishli shart-sharoitlar yaratish;

tadqiqotchilar tomonidan mamlakatimizda amalga oshirilayotgan islohotlarning mazmun-mohiyati va ahamiyatini keng jamoatchilikka yetkazish borasidagi tizimli ishlarni amalga oshirilishiga erishish;

davlat hokimiyati va boshqaruvini yanada demokratlashtirishning huquqiy asoslarini, fuqarolik jamiyatini hamda sud-huquq tizimini takomillashtirish va rivojlantirish bo'yicha fundamental va amaliy tadqiqot ishlarini amalga oshirish.

b) tadqiqotchilar tomonidan sohadagi xorijiy tajribani o'rgangan holda, ilmiy-tadqiqotlar sifati hamda samaradorligini oshirishga xizmat qiladigan innovatsion loyihalar ishlab chiqishi hamda ularni "start-up" tanlovlarida ishtirok etishiga ko'maklashish sohasida:

ilm-fan, ta'lim, amaliyotning uyg'unligini ta'minlash;

maqsadli dasturlar, grant loyihalari yuzasidan ilmiy tadqiqotlarni olib borish uchun tanlov hujjatlarini tayyorlash hamda innovatsion dasturlarda ishtirok etish;

rivojlangan xorijiy davlatlarning ta'lim va ilmiy muassasalari bilan hamkorlikda qo'shma ilmiy tadqiqotlarni amalga oshirish;

kafedra ixtisosligi bo'yicha nazariy va amaliy mavzular doirasida ilmiy-tadqiqot ishlarini amalga oshirish;

rivojlangan xorijiy davlatlar huquqi va huquqiy tizimlarining qiyosiy tadqiqotlari natijalarini hisobga olgan holda xalqaro huquq normalarini implementatsiya qilish va milliy qonunchilikni takomillashtirish bo'yicha takliflar ishlab chiqish;

ishlab chiqilgan axborot huquqiy texnologiyalari va tizimlari orqali davlat va huquq sohasida ilmiy va innovatsion tadqiqotlarni o'tkazishda ishtirok etish.

d) xalqaro standartlarga javob beradigan kafedraning boy intellektual va ilmiy-pedagogik mahoratga ega ilmiy-pedagog kadrlar tayyorlash tizimini shakllantirish bo'yicha aniq maqsadli ishlarni amalga oshirish sohasida:

ilmiy-tadqiqot ishlari konferensiyalar, davra suhbatlari hamda ilmiy seminarlar tashkil etish;

tanlangan yo'nalish bo'yicha dolzarb ilmiy va amaliy muammolarni hal etish bo'yicha ilmiy tadqiqotlarni olib borish;

yuqori malakali ilmiy kadrlarni tayyorlash va shu orqali universitetda ilmiy salohiyatning oshirilishiga hissa qo'shish;

tadqiqotchilarni kafedralardagi fan doktori, professorlarning bilim va shaxsiy tajribasidan foydalangan holda yurisprudensiya sohalarida chuqur nazariy va amaliy bilim olishini ta'minlash hamda ularni ilmiy faoliyat bilan shug'ullanishga bo'lgan qiziqishini yuksaltirish;

ilmiy tadqiqotlarni amalga oshirish jarayoniga bakalavriat va magistratura talabalari, doktorant hamda mustaqil izlanuvchilarni jalb qilish;

darslik, o'quv qo'llanmalari va boshqa ishlarni ilmiy tahrir qilish;

universitetni xalqaro tan olingan ta'lim muassasalari reytingiga kiritish bo'yicha chora-tadbirlarni amalga oshirish orqali milliy yuridik ta'lim raqobatbardoshligini oshirishda ishtirok etish.

e) tegishli tashkilotlarning buyurtmasiga asosan ma'lum bir sohada haq evaziga ilmiy-tadqiqot ishlarini amalga oshirish sohasida:

ilmiy-tadqiqot ishlarini amalga oshirish, ularni nashr qilishga tavsiya etish va natijalarini ishlab chiqarishga joriy etish, ta'lim, fan va ishlab chiqarishning integratsiyasini samarali ta'minlash;

kafedra ixtisosligi bo'yicha ilmiy ishlarga taqriz va ekspert xulosasini tayyorlash;

ilmiy va ilmiy-pedagogik kadrlar, talabalar tomonidan ilmiy ishlanmalarni (monografiyalar, risolalar, ilmiy-amaliy qo'llanmalar, axborot-tahliliy materiallar, ilmiy maqolalar va boshqalar) chop etish;

normativ-huquqiy hujjat loyihalarini tayyorlash borasidagi faoliyatni tashkil etish hamda normativ-huquqiy hujjat loyihalarini ishlab chiqishda ishtirok etish;

tashkilotlarning buyurtmasiga asosan haq evaziga ilmiy-tadqiqot ishlarini amalga oshirishda ishtirok etish.

10. Ilmiy-tadqiqot markazlari o'z vakolatlari doirasida boshqa vazifa va funksiyalarni ham amalga oshirishi mumkin.

II. Ilmiy-tadqiqot markazining huquq va majburiyatlari

11. Ilmiy-tadqiqot markazi o'z zimmasiga yuklatilgan vazifa va funksiyalarni bajarishda quyidagi huquqlarga ega:

a) boshqa tarkibiy bo'linmalardan zarur ma'lumotlarni, jumladan Ilmiy-tadqiqot markazlari faoliyatiga taalluqli materiallarni so'rab olish;

b) Universitetda Ilmiy-tadqiqot markazi faoliyatiga taalluqli masalalar muhokamasida va ularning hal etilishida ishtirok etish;

d) Ilmiy-tadqiqot markazi a'zolarini rag'batlantirish to'g'risida tegishli kafedra hamda dekanatlarga takliflar kiritish;

e) Ilmiy-tadqiqot markazi faoliyatiga doir hujjatlarni ishlab chiqishda ishtirok etish.

Ilmiy-tadqiqot markazi qonunchilik hujjatlariga muvofiq boshqa huquqlarga ham ega bo'lishi mumkin.

12. Ilmiy-tadqiqot markazi:

a) talabalarning bilim olishga, malaka va ko'nikmalarga ega bo'lishga qiziqishlarini oshirish bo'yicha takliflar ishlab chiqishga;

b) faoliyatining barcha yo'nalishlari bo'yicha yuqori samaradorlikni ta'minlashga;

d) Universitetning Ichki tartib qoidalari (ichki mehnat tartibi qoidalari), Toshkent davlat yuridik universitetining Odob-axloq kodeksi, Toshkent davlat yuridik universiteti xodim, talaba, o'quvchi va doktorantlari tomonidan korrupsiyaviy huquqbuzarliklar sodir etishga og'irish maqsadida murojaat qilish holatlari haqida xabardor qilish to'g'risidagi nizom, Toshkent davlat yuridik universitetining korrupsiyaga qarshi kurashish dasturi (siyosati)ga va boshqa lokal hujjatlariga rioya etishga;

e) Universitet rahbariyati, yuqori turuvchi tarkibiy bo'linmalar, tegishli dekanat va kafedralar tomonidan berilgan topshiriqlarni o'z vaqtida va sifatli ijro etilishini ta'minlashga majbur.

Ilmiy-tadqiqot markaziga qonunchilik hujjatlariga muvofiq boshqa majburiyatlar ham yuklatilishi mumkin.

IV. Ilmiy-tadqiqot markazi faoliyatini tashkil etish

13. Ilmiy-tadqiqot markazini universitet rektori bo'yrug'i bilan lavozimga tayinlanadigan va lavozimidan ozod etiladigan jamoatchilik asosida faoliyat yurituvchi direktor boshqaradi.

14. Direktor, qoida tariqasida, ilmiy daraja yoki ilmiy unvonga ega bo'lishi lozim va unga Ilmiy-tadqiqot markazi faoliyati uchun shaxsiy mas'uliyat yuklatiladi.

Istisno tariqasida tegishli mutaxassislik sohasida chuqur bilim, yetarli amaliy tajribaga ega bo'lgan va o'ziga yuklatilgan xizmat vazifalarini to'liq hajmda va sifatli bajarayotgan xodim Ilmiy-tadqiqot markazi direktori lavozimiga tayinlanishi mumkin.

15. Ilmiy-tadqiqot markazi direktori:

Ilmiy-tadqiqot markazi faoliyatiga umumiy rahbarlik qiladi, ishlarni tashkillashtiradi, yo'naltiradi va nazorat qiladi;

Universitet Ilmiy-uslubiy kengashi yig'ilishlarida ishtirok etadi;

Universitet miqyosida Ilmiy-tadqiqot markazi faoliyatiga taalluqli masalalar muhokamasi va ularning hal etilishida ishtirok etadi;

Ilmiy-tadqiqot markazi a'zolari o'rtasida vazifalarni taqsimlaydi hamda ularning o'z vaqtida va sifatli bajarilishini nazorat qiladi;

Ilmiy-tadqiqot markazi a'zolarini rag'batlantirish to'g'risida universitet rahbariyatiga takliflar kiritadi;

Ilmiy-tadqiqot markazining o'quv yilidagi faoliyati bo'yicha hisobot tayyorlaydi va tegishli universitet kengashida hisobot beradi.

16. Ilmiy-tadqiqot markazi faoliyatiga tegishli vazifa va topshiriqlarni sifatli, o'z vaqtida bajarilishi bevosita Ilmiy ishlar va innovatsiyalar bo'yicha prorektor tomonidan nazorat qilinadi hamda ta'minlanadi.

V. Yakuniy qoida

17. Ilmiy-tadqiqot markazlarini qayta tashkil etish va tugatish qonunchilik hujjatlarida belgilangan tartibda amalga oshiriladi.